

七

卷之十
四九三五

後漢書卷四十九

宋 宣 城 太 守 范 曄 撰

唐 章 懷 太 子 賢 注

耿弇列傳第九

耿弇傳 弟 國 子 秉 秉 弟 夔 國 弟 子 恭

耿弇字伯昭扶風茂陵人也其先武帝時以吏二千石

自鉅鹿徙焉武帝時徙吏二千石高資富人及豪傑并兼之家於諸陵也父況字俠

游以明經爲郎與王莽從弟伋共學老子於安丘先生

嵇康聖賢高士傳曰安丘望之字仲都京兆長陵人少持老子經恬淨不求進宦號曰安丘丈人成帝聞欲見

之望之辭不肯見後爲朔調連率王莽改上谷郡曰朔調守曰連率弇

少好學習父業

袁山松書曰弁少學詩禮明銳有權謀

常見郡尉試騎士

建旗鼓隸馳射由是好將帥之事

漢官儀曰歲終郡試之時講武勒兵因以

校獵簡其材力也

○劉攽曰常見郡尉試騎士按漢謂

郡試騎士講武爲都試後人不曉妄改爲尉注所云郡

字亦合作都且講武不專在都尉何得云尉試乎都試見前書

及王莽敗更始立諸將

略地者前後多擅威權輒改易守令況自以莽之所置

懷不自安時弁年二十一乃辭況奉奏詣更始因齎貢

獻以求自固之宜及至宋子會王郎詐稱成帝子興起

兵邯鄲弁從吏孫倉衛包於道共謀曰劉子輿成帝正

統捨此不歸遠行安之弁按劒曰子輿弊賊卒爲降虜

耳我至長安與國家陳漁陽上谷兵馬之用還出太原

代郡反覆數十日歸發突騎以麟鳥合之衆

麟輓也音力刃反

如摧枯折腐耳觀公等不識去就族滅不久也倉包不

從遂亡降王郎弇道聞光武在盧奴乃馳北上謁光武

留署門下吏

○劉攽曰按百官志公府有門史又祭遵亦爲門下史知此當作史字

弇因

說護軍朱祐求歸發兵以定邯鄲光武笑曰小兒曹乃

有大意哉因數召見加恩慰

續漢書曰弇還檄與況陳上功德自嫌年少恐不見

信宜自來況得檄立發至昌平見上也

弇因從光武北至薊聞邯鄲兵方

到光武將欲南歸召官屬計議弇曰今兵從南來不可

南行漁陽太守彭寵公之邑人

寵南陽宛人也

上谷太守卽弇

父也發此兩郡控弦萬騎邯鄲不足慮也光武官屬腹

心皆不肯曰死尙南首柰何北行入囊中

漁陽上谷北接塞垣至彼

路窮如入囊也

光武指弇曰是我北道主人也會薊中亂

續漢志曰

弇歸主人食未已薊中擾亂上駕出南城門頗遮絕輜重城中相掠弇既與上相失以馬與城門亭長乃得出也

光武遂南馳官屬各分散弇走昌平就況

昌平縣名屬上谷郡

今幽州縣故城在縣東也

因說況使寇恂東約彭寵各發突騎二千

匹步兵千人弇與景丹寇恂及漁陽兵合軍而南所過

擊斬王郎大將九卿校尉以下四百餘級得印綬百二

十五節二斬首三萬級定涿郡中山鉅鹿清河河間凡

二十二縣遂及光武於廣阿是時光武方攻王郎傳言

二郡兵爲邯鄲來衆皆恐旣而悉詣營上謁光武見弇

等說曰當與漁陽上谷士大夫共此大功乃皆以爲偏將軍使還領其兵加況大將軍興義侯得自置偏裨弇等遂從拔邯鄲時更始徵代郡太守趙永而況勸永不應召令詣于光武光武遣永復郡永北還而代令張暉據城反畔乃招迎匈奴烏桓以爲援助光武以弇弟舒爲復胡將軍使擊暉破之永乃得復郡時五校賊二十餘萬北寇上谷況與舒連擊破之賊皆退走更始見光武威聲日盛君臣疑慮乃遣使立光武爲蕭王令罷兵與諸將有功者還長安遣苗曾爲幽州牧韋順爲上谷太守蔡充爲漁陽太守並北之部時光武居邯鄲宮晝

臥溫明殿

漢趙王如意之殿也故基在今洛州邯鄲縣內

弁入造牀下請間因

說曰今更始失政君臣淫亂諸將擅命於畿內貴戚縱

橫於都內

更始傳曰李軼朱鮪擅命山東王匡張卬橫暴三輔

天子之命不出城

門所在牧守輒自遷易百姓不知所從士人莫敢自安

擄掠財物劫掠婦女懷金玉者至不生歸元元叩心更

思莽朝又銅馬赤眉之屬數十輩輩數十百萬聖公不

能辦也

辦猶成也音蒲莧反

其敗不久公首事南陽破百萬之軍

今定河北北據天府之地

前書曰關中所謂金城天府弁以河北富饒故以喻焉○

劉攽曰河北北據按文多一北字

以義征伐發號響應天下可傳檄而

定天下至重不可令它姓得之聞使者從西方來欲罷

兵不可從也今吏士死亡者多弇願歸幽州益發精兵

以集其大計

○劉攽曰按文多一其字

光武大說

續漢書曰光武初見弇言起坐曰卿

失言我斬卿弇曰大王哀厚弇如父子故披赤心爲大王陳事上曰我戲卿耳乃拜弇爲大將

軍與吳漢北發幽州十郡兵弇到上谷收韋順蔡充斬

之漢亦誅苗曾於是悉發幽州兵引而南從光武擊破

銅馬高湖赤眉青犢又追尤來大槍五幡於元氏弇常

將精騎爲軍鋒輒破走之光武乘勝戰慎水上虜危急

殊死戰時軍士疲弊遂大敗奔還壁范陽數日乃振

壁謂

築壘壁也

賊亦退去從追至容城小廣陽安次連戰破之

容城

縣名屬涿郡故城在今易州道縣也廣陽國有廣陽縣故曰小廣陽及安次縣名並在今幽州也

光武

還薊復遣弇與吳漢景丹蓋延朱祐邳彤耿純劉植岑

彭祭遵堅鐔王霸陳俊馬武十三將軍追賊至潞東及

平谷

平谷解見光武紀

再戰斬首萬三千餘級遂窮追於右北

平無終土垠之間

無終土垠並縣名屬右北平郡無終故城在今漁陽縣土垠故城在今平

州西南

垠音銀至浚靡而還

浚靡縣名屬右北平故城在今漁陽縣北靡音麻

賊散入

遼西遼東或爲烏桓貊人所鈔擊略盡光武卽位拜弇

爲建威大將軍與驃騎大將軍景丹彊弩將軍陳俊攻

厭新賊於敖倉皆破降之建武二年更封好時候食好

時美陽二縣三年延岑自武關出攻南陽下數城穰人

杜弢率其衆以從岑弇與岑等戰於穰大破之斬首三

千餘級生獲其將士五千餘人得印綬三百杜弘降岑
與數騎遁走東陽弇從幸春陵因見自請北收上谷兵
未發者定彭寵於漁陽取張豐於涿郡還收富平獲索
東攻張步以平齊地帝壯其意乃許之四年詔弇進攻
漁陽弇以父據上谷本與彭寵同功又兄弟無在京師
者自疑不敢獨進上書求詣洛陽詔報曰將軍出身舉
宗爲國所向陷敵功效尤著何嫌何疑而欲求徵且與
王常共屯涿郡勉思方略況聞弇求徵亦不自安遣舒
弟國入侍帝善之進封況爲隃麋侯

隃麋縣名屬右扶風故城在今隴州

汧陽縣東
南隃音隃

乃命弇與建義大將軍朱祐漢忠將軍王常

等擊望都故安西山賊十餘營皆破之

望都縣名屬中山國堯母慶都

山在南故以名焉故城在今定州唐縣東北故安縣名故城在今易州易縣東南

時征虜將軍

祭遵屯良鄉

良鄉縣名屬涿郡

驍騎將軍劉喜屯陽鄉

陽鄉縣名屬涿

郡故城在今幽州故安縣西北

以拒彭寵寵遣弟純將匈奴二千餘騎

寵自引兵數萬分爲兩道以擊遵喜胡騎經軍都

軍都縣屬

廣陽郡有軍都山在西北今幽州昌平縣

舒襲破其衆斬匈奴兩王寵乃退

走況復與舒攻寵取軍都五年寵死天子嘉況功使光

祿大夫持節迎況

袁山松書曰使光祿大夫樊宏詔況曰惟況功大不宜監察從事邊郡寒

苦不足久居其詣行在所

賜甲第奉朝請封牟平侯遣弇與吳漢擊

富平獲索賊於平原大破之降者四萬餘人因詔弇進

討張步弇悉收集降卒結部曲置將吏率騎都尉劉歆

太山太守陳俊引兵而東從朝陽橋濟河以度

朝陽縣名屬濟

南郡在朝水之陽今朝城在濟水北有漯河在今齊州臨濟縣東

張步聞之乃使其大

將車費邑軍歷下

歷下城在今齊州歷城縣也

又分兵屯祝阿

祝阿今齊

州縣也故城在今山荏縣東北

別於太山鍾城列營數十以待弇弇度

河先擊祝阿自旦攻城未中而拔之故開圍一角令其

衆得奔歸鍾城鍾城人聞祝阿已潰大恐懼遂空壁亡

去費邑分遣弟敢守巨里

巨里聚名也一名巨合城在今齊州全節縣東南也

弇

進兵先脅巨里使多伐樹木揚言以填塞坑塹數日有

降者言邑聞弇欲攻巨里謀來救之弇乃嚴令軍中趣

修攻具宣勅諸部後三日當悉力攻巨里城陰緩生口

令得亡歸歸者以弇期告邑邑至日果自將精兵三萬

餘人來救之弇喜謂諸將曰吾所以修攻具者欲誘致

邑耳今來適其所求也卽分三千人守巨里自引精兵

上岡阪

爾雅曰山脊曰岡阪者曰阪

乘高合戰大破之臨陳斬邑旣

而收首級以示巨里城中城中兇懼

兇恐懼聲音呼勇反

費敢悉

衆亡歸張步弇復收其積聚縱兵擊諸未下者平四十

餘營遂定濟南時張步都劇使其弟藍將精兵二萬守

西安

西安縣名屬齊郡故城在今青州臨淄縣西北

諸郡太守合萬餘人守臨

淄相去四十里弇進軍畫中

畫中邑名也畫音胡麥反故城在今西安城東南有

澧水因名焉

居二城之間弇視西安城小而堅且藍兵又精

臨淄名雖大而實易攻乃勅諸校會

會猶集也

後五日攻西

安藍聞之晨夜儆守至期夜半弇勅諸將皆蓐食

前書音義

曰未起而牀蓐中食也

會明至臨淄城護軍荀梁等爭之以爲宜

速攻西安弇曰不然西安聞吾欲攻之日夜爲備臨淄出不意而至必驚擾吾攻之一日必拔拔臨淄卽西安孤張藍與步隔絕必復亡去所謂擊一而得二者也若先攻西安不卒下頓兵堅城死傷必多縱能拔之藍引軍還奔臨淄并兵合執觀人虛實吾深入敵地後無轉輸旬月之間不戰而困諸君之言未見其宜遂攻臨淄

半日拔之入據其城張藍聞之大懼遂將其衆亡歸劇

弇乃令軍中無得妄掠劇下須張步至乃取之以激怒

步步聞大笑曰以尤來大槍十餘萬衆吾皆卽其營而

破之今大耿兵少於彼

弇況之長子故呼爲大耿

又皆疲勞何足摧

乎乃與三弟藍弘壽及故大槍渠帥重異等兵

重姓異名號

二十萬至臨淄大城東將攻弇

袁山松書曰弇上書曰臣據臨淄深塹高壘張

步從劇縣來攻疲勞饑渴欲進誘而攻之欲去隨而擊之臣依營而戰精銳百倍以逸待勞以實擊虛旬日之

間步首可獲上是其計也

弇先出淄水上與重異遇突騎欲縱弇恐

挫其鋒令步不敢進故示弱以盛其氣乃引歸小城陳

兵於內

伏琛齊地記曰小城內有漢景王祠

步氣盛直攻弇營與劉歆等

合戰弇升王宮壞臺望之

臨淄本齊國所都卽齊王宮中有壞臺也東觀記作環臺

視歆等鋒交乃自引精兵以橫突步陳於東城下大破之飛矢中弇股以佩刀截之左右無知者至暮罷弇明旦復勒兵出是時帝在魯聞弇爲步所攻自往救之未至陳俊謂弇曰劇虜兵盛可且閉營休士以須上來弇曰乘輿且到臣子當擊牛醢酒以待百官反欲以賊虜遺君父邪乃出兵大戰自旦及昏復大破之殺傷無數城中溝塹皆滿弇知步困將退豫置左右翼爲伏以待之

兩旁伏兵如鳥之翼

人定時步果引去伏兵起縱擊追至鉅昧

水上

鉅昧水名一名巨洋水在今青州壽光縣西

八九十里僵尸相屬收得

輜重二千餘兩步還劇兄弟各分兵散去後數日車駕

至臨淄自勞軍羣臣大會帝謂弁曰昔韓信破歷下以

開基

前書曰齊屯田於歷下以備漢信擊破之

今將軍攻祝阿以發迹此皆

齊之西界功足相方而韓信襲擊已降

前書曰酈食其說齊王田廣廣

降之乃與食其縱酒罷守備韓信聞齊已降欲止蒯通說信令擊之食其音異基也

將軍獨拔勅

敵其功乃難於信也又田橫亨酈生及田橫降高帝詔

衛尉不聽爲仇

前書曰齊旣破橫走居海島高帝召之橫曰臣亨陛下之使酈食其今聞其弟

商爲衛尉臣恐懼不敢奉詔高帝詔酈商曰橫卽至敢動者族之

張步前亦殺伏隆若

步來歸命吾當詔大司徒釋其怨

大司徒伏湛卽隆之父

又事尤

相類也將軍前在南陽建此大策

謂弁從帝幸春陵時請收上谷兵定彭寵